

菩提道次第略論補充資料

1. 「禪典要密。宜對之有宗。若漏失根源。枝尋不全。」(《出三藏記集》卷九〈修行地不淨觀經序〉(T55, p. 66, b23-25))
2. 「眾生本無我 念念不可得 住於平等者 應當如是觀
一切法平等 本性常空寂 文字有分別 諸法本無差

諸乘種種說 無為性平等 導師善方便 分別說三乘」
(《大寶積經》卷第一百一十一〈信童女會第四十〉(T11, p. 624, a23-b7))
3. 「佛告比丘。諦聽。善思。當為汝說。比丘當知。若聞色是生厭·離欲·滅盡·寂靜法。是名多聞。如是聞受·想·行·識。是生厭·離欲·滅盡·寂靜法。是名多聞比丘。是名如來所說多聞。」(《雜阿含經》卷一(T02, p. 5, c3-7))
4. 「若受想若行若識。若多若少若內若外若近若遠。過去未來現在。都無有我亦無我所。如實知見。賢聖弟子見是事已。即名多聞。」(《別譯雜阿含經》卷十六(T02, p. 486, a9-12))
5. 「菩薩多聞有十種利益。何等為十。一者知煩惱資助。二者知清淨助。三者遠離疑惑。四者作正直見。五者遠離非道。六者安住正路。七者開甘露門。八者近佛菩提。九者與一切眾生而作光明。十者不畏惡道。」(《月燈三昧經》卷六(T15, p. 585, b16-20))
6. 「云何菩薩無雜染心聽聞正法。謂聽法時其心**遠離貢高雜染其心。遠離輕慢雜染其心。遠離怯弱雜染**。由六種相其心遠離貢高雜染。由四種相其心遠離輕慢雜染。由一種相其心遠離怯弱雜染。謂聽法時。應時而聽愍重而聽恭敬而聽。不為損害不為隨順不求過失。由此六相其心遠離貢高雜染。又聽法時。恭敬正法恭敬說法補特伽羅。不輕正法不輕說法補特伽羅。由此四相其心遠離輕慢雜染。又聽法時。不自輕蔑。由此一相其心遠離怯弱雜染。菩薩如是無雜染心聽聞正法。云何菩薩**無散亂心聽聞正法**。謂由五相。一者求悟解心聽聞正法。二者專一趣心聽聞正法。三者聆音屬耳聽聞正法。四者掃滌其心聽聞正法。五者攝一切心聽聞正法。菩薩如是求聞正法。菩薩何故求聞正法。謂諸菩薩求內明時。為正修行法隨法行。為廣開示利悟於他。」(《瑜伽師地論》卷三十八〈本地分中菩薩地第十五初持瑜伽處菩提品第七〉(T30, p. 502, b24-p 503, a3))